

# Чанъгъ-чиирг

## Төл авчана

Приютненск района 4-ч номертә совхозин хөөчир хөд хургълуллгъна көдлмшиг сәәнәр кедж хөөдәсн чанъгъ-чиирг, бооджнъгъу хургъд авчацхана.

Эн джил, совхозд 13 отар хөн хургълх зөвтә.

Хургъдта хөд бәрх хаша-хаацнь у, сарул, хатсу, хаша дотр — хургъд бәрх клеткс болн нань чигн кергтә хамг зер-зевнь цугъар күүц.

Хургълджах отармудар сакманщикүд болдж 136 күн көдлджәнә. Хургълх отар болгънд күрм элвг концентрированн хот бәәнә. Хөөдт болн хургъдт өгх давсн болн церд бас элвгәр бел кегдсн бәәнә.

Эн совхозин 5-ч номертә фермин ах хөөч үр Долгаевин отар үвләс сәнчинәтә, гару уга, эрүл-менд гарв. Хәләджәх хөөднь нургълдж хургълчкв. Гарсн хургъдаснь нег чигн гару уга, эрүл-менд, сәәнәр өсджәнә. Зун хөн болгънас 117,4 хургъ авч. Ах хөөч үр Долгаев хөөдән болн хургъдан эзн кевәр арднь орад, эврәннь үнн седклән өгч хәләнә.

4-ч номертә совхозин негдгч фермин ах хөөч үр Пашнаков 747 толгъа нәәдир хөд хәләджәнә. Хөднь үвләс таргън-цатхлнь гарсн учрар теднәс төл авлгън сәәнәр кегдджәнә. Тегәд теднәс гарсн хургъднь цугъар бооджнъгъу, чанъгъ-чиирг. Ода цуг хургълх хөөдәснь 549 толгъа хөн хургълчкв. Хургъдаснь гару уга.

Совхозин специалистир болн партиян, профсоюзн болн комсомольск организацс, хө хургълуллгънд көдлджәх улст дөнъ-тусан өгч, таслвр уга цәәлгъврин көдлмш делгрүлджәнә.

А. МАТВЕЕВ.